

## My School (Moja škola)

*My School* (Moja škola) vebsajt sadrži profile preko 9.500 australijskih škola. Može ih se pretraživati prema adresi škole, sektoru ili nazivu.

Vebsajt navodi informacije o statistici i kontekstu za svaku školu, kao i rezultate Nacionalnog programa testiranja iz pismenosti i računanja (National Assessment Program – Literacy and Numeracy – NAPLAN). Te informacije se mogu usporediti s rezultatima iz škola širom Australije, koje pohađaju đaci koji su statistički sličnog porijekla. Informacije o Nacionalnom programu testiranja se mogu naći na NAPLAN vebsajtu (vidi [www.nap.edu.au](http://www.nap.edu.au)).

*My School* vodi Australijska uprava za školski program, testiranje i izvještavanje (Australian Curriculum, Assessment and Reporting Authority – ACARA). ACARA je statutarno tijelo Australijske Vlade, zaduženo za prikupljanje informacija i izvještavanje o australijskim školama, sprovođenje nacionalnog testiranja iz pismenosti i računanja, te za razrađivanje nacionalnog školskog programa.

*My School* vebsajt svakom pruža priliku da sazna više o australijskim školama, a australijskim školama omogućava da saznaju više jedne o drugima. Sadrži i niz podataka o kvalitetu, koje nastavnici, škole, roditelji i šira zajednica mogu koristiti, zajedno s drugim informacijama, da lakše obezbijede da svako dijete u svakom razredu prima visokokvalitetno obrazovanje.

### Korištenje *My School* vebsajta

Specifično, posjetioci *My School* vebsajta mogu očekivati da nađu informacije o broju đaka u svakoj školi, njihov prosječan uspjeh u NAPLAN testiranju, indikaciju kako đaci s vremenom napreduju, te finansijske informacije o školi u poređenju sa svim australijskim školama. Postoje i druge korisne informacije, kao na primjer procenat pohađanja nastave i broj školskog osoblja u svakoj školi.

Vebsajt koristi indeks karakteristika učenika i škola, poznat kao Indeks socijalno-obrazovne prednosti (Index of Community Socio-Educational Advantage - ICSEA) za identificiranje škola za đake statistički sličnog porijekla. Informacije o zanimanju i školovanju roditelja, zajedno s podacima u upisu u škole, se koriste za izračunavanje ICSEA vrijednosti za svaku školu. Ta vrijednost predstavlja nivo prosječne obrazovne prednosti za đake te škole.

ICSEA omogućava da se rezultati đaka u nacionalnom testu mogu razumjeti i usporediti na fer i smislen način. Školama koje žele poboljšati svoje rezultate omogućava da uče od drugih škola koje imaju statistički sličnu populaciju.

Škole, nastavnici, roditelji i zajednica mogu koristiti informacije na *My School* da:

- dobiju informacije o školi, koristeći nacionalno dosljedne indikatore
- usporede uspjeh đaka neke škole s prosječnim uspjehom škola koje pohađaju đaci statistički sličnog porijekla, te sa svim školama u Australiji
- identificiraju i uče o školama s visokim rezultatima, uključujući škole u kojima đaci postižu značajan napredak
- steknu šire razumijevanje o uspjehu škola u lokalnoj zajednici.

Posjetioci na *My School* mogu taj vebsajt pregledavati preko pet stavki izbornika:

- Profil škole
- Finansije škole
- NAPLAN
- VET u školama
- Lokalne škole

## Profil škole

Svaka škola ima stranicu s profilom koja uključuje:

- kratki opis škole
- činjenice o školi koje uključuju informacije o školskom sektoru, vrsti i ukupnom broju upisa
- broj nastavnika i ne-nastavnog osoblja
- kratki pregled školskih finansijskih informacija
- link na veb-sajt škole i, ako se to odnosi na tu školu, link na veb-sajt školskog sektora ili sistema kojem ta škola pripada
- podatke na nivou škole o porijeklu đaka
- vrijednost indeksa te škole, odnosno Index of Community Socio-Educational Advantage (ICSEA)
- upis đaka i njihovo pohađanje nastave
- školske rezultate za više razrede srednje škole
- kratki pregled brojeva đaka upisanih u kurseve za stručno obrazovanje i obuku (vocational education and training – VET) i školski-bazirano šegrtovanje i pripravnštvo.

## Finansije škole

Navedeni su finansijski podaci za svaku školu. Ti podaci uključuju ponavljani prihod – iznos iz prihoda kojim se plaća poslovanje škole – kao i kapitalni troškovi za svaku prijavljenu kalendarsku godinu.

Detaljna objašnjenja o finansijskom izvještavanju se mogu dobiti u PDF formatu na popisu materijala navedenih na veb-sajtovoj 'More information' stranici.

## NAPLAN rezultati

NAPLAN ocjenjuje đake u pet uobičajenih područja nacionalnog testiranja. To su:

- čitanje
- pisanje
- pravopis
- gramatika i znakovi interpunkcije
- računanje.

Svi đaci u Years 3, 5, 7 i 9 u državnim i ne-državnim školama širom Australije polažu NAPLAN testove.

Na veb-sajtu se navode NAPLAN podaci za svako područje testiranja, za svaki razred. Navedeni su podaci za svaku godinu u kojoj se održavalo NAPLAN testiranje.

Navedeni su NAPLAN rezultati za svaku od specijalizovanih škola, škola za učenike statistički sličnog porijekla, te za sve australijske škole. Također je navedena analiza napretka u učenju za đake koji su NAPLAN testove polagali dva puta u istoj školi i dobili ocjene na nivou dva razreda.

## VET u školama

Za škole u kojima đaci pohađaju VET kurseve, veb-sajt navodi broj upisa u svaki kurs te stečene kvalifikacije đaka, sortiranih po nivou kvalifikacije i (ako postoje) po vrsti industrije.

## Lokalne škole

Može se pogledati lista sa do 20 škola koje se nalaze u radijusu od 80 kilometara od izabrane škole. Uz te škole su navedeni su i linkovi na njihove stranice s profilom škole, kako bi posjetioci lakše pregledavali veb-sajt. Funkcija za mapiranje omogućava korisniku da vidi lokaciju te škole zajedno s drugim školama u istom području.